

**PROPOZICIJE**  
**takmičenja Odbojkaškog saveza Bosne i Hercegovine Premijer**  
**liga**

Sarajevo, oktobar 2020. godine

Na osnovu člana 30. Statuta Odbojkaškog saveza Bosne i Hercegovine, Upravni odbor OS BiH na sjednici održanoj dana 16.06.2020. godine i 07.10.2020. godine, donio je

## **PROPOZICIJE**

### **takmičenja Odbojkaškog saveza Bosne i Hercegovine Premijer liga**

#### Član 1.

Takmičenje se sprovodi u skladu sa Međunarodnim pravilima igre, Pravilnikom o takmičenju OS BiH, ovim propozicijama i drugim aktima kojim se regulišu pitanja takmičenja.

#### Član 2.

Premijer liga u muškoj i ženskoj konkurenciji broji po 10 klubova. Takmičenje se odvija u dvije faze:

- LIGA,
- PLAY OFF,

#### LIGA

Takmičenje se odvija na ligaškom principu, po dvostrukom bod sistemu, rasporedom po "Beregeru" na osnovu takmičarskih brojeva klubova.

Po završetku ligaškog dijela takmičenja, dva posljednja plasirana kluba ispadaju iz Premijer lige BiH. U Premijer ligu BiH ulaze prvaci prvih liga OS F BiH i OS RS.

PLAY OFF se igra za prvaka Bosne i Hercegovine na sljedeći način:

#### Četvrtfinale:

Sastaju se I i VIII- plasirani klub (meč A), II i VII- plasirani klub (meč B), III i VI- plasirani klub (meč C) i IV i V- plasirani klub meč (D).

Mečevi se igraju u dva dobijena susreta. Prvi meč se igra kod slabije plasiranog kluba, a drugi i eventualno treći meč (u dva "vezana" dana) kod bolje plasiranog kluba. Polufinale:

Sastaju se pobjednik meča A i pobjednik meča D (meč E) i pobjednik meča B i pobjednik meča C (meč F).

Mečevi se igraju u dva dobijena susreta. Prvi meč se igra kod slabije plasiranog kluba, a drugi i eventualno treći meč (u dva "vezana" dana) kod bolje plasiranog kluba. Finale:

Sastaju se pobjednici polufinalnih mečeva. Mečevi se igraju u dva dobijena susreta. Prvi meč se igra kod slabije plasiranog kluba (pobjednik meča F), a drugi i eventualno treći meč (u dva "vezana" dana) kod bolje plasiranog kluba (pobjednik meča E).

Pobjednik u finalu Play off-a postaje prvak Bosne i Hercegovine i stiče pravo takmičenja u evropskim kupovima u skladu sa pravilima CEV-a. U slučaju da u evropskim kupovima može učestvovati veći broj klubova, klubovi stiču pravo po sljedećem redosljedu:

- prvak Bosne i Hercegovine,
- pobjednik Kup-a Bosne i Hercegovine,
- konačan poredak na tabeli Premijer lige Bosne i Hercegovine.

Ukoliko slabije plasirani klub eliminiše u Play off-u bolje plasirani klub, on zauzima njegovu poziciju iz ligaškog dijela takmičenja za nastavak takmičenja u Play off-u.

Ako prvak Bosne i Hercegovine postane klub koji u ligaškom dijelu nije zauzeo prvo mjesto na tabeli, konačan poredak klubova određuje se na način da se svi klubovi pomjeraju za jedno mjesto unazad do mjesta na kojem se nalazi klub koji je postao prvak Bosne i Hercegovine. Ostali klubovi koji učestvuju u Play off-u zadržavaju mjesto u konačnoj tabeli koje su imali po završetku ligaškog dijela.

U Premijer ligu BiH ulaze prvaci najvišeg stepena takmičenja u OS F BiH i OS RS, a koji su dužni izvršiti licenciranje sportske dvorane najkasnije do usvajanja takmičarskih dokumenata za takmičarsku 2020/2021. sezonu.

#### CEV TAKMIČENJA

Klub koji stekne pravo učešća u CEV takmičenjima, a odustane od učešća, nema pravo nastupa u drugim međunarodnim takmičenjima u istoj takmičarskoj sezoni.

#### Član 3.

U takmičenjima za svaku dobijenu utakmicu sa 3-0 i 3-1 klub dobija tri boda, a za utakmicu dobijenu sa 3-2 pobjednik dobija dva boda, a poraženi jedan bod.

Klub koji izgubi utakmicu rezultatom 3-0 i 3-1 ne dobija bodove, a klubu koji neopravdano ne odigra utakmicu oduzimaju se dva boda.

Plasman se utvrđuje na osnovu osvojenih bodova. U slučaju istog broja bodova odlučuje broj pobjeda, bolji količnik u setovima, ako je isti broj pobjeda, odnosno poen količnik u slučaju istog set količnika.

Ukoliko se zbog opravdanih uslova ne može završiti takmičenje postupiće se po pravilniku o takmičenju u OS BiH.

#### Član 4.

Takmičenjem u svim fazama rukovodi Odbor za hitna pitanja OS BiH, a sprovodi direktor takmičenja OS BiH. Nadležnost Odbora za hitna pitanja OS BiH i direktora takmičenja utvrđene su Pravilnikom o takmičenju OS BiH.

#### Član 5.

Klubovi su obavezni uplatiti kotizaciju za takmičenje u fond zajedničkih troškova za organizaciju i sprovođenje takmičenja prema odluci Upravnog odbora OS BiH.

Bez izvršenih finansijskih obaveza klubovi ne mogu učestvovati u takmičenju.

#### Član 6.

Utakmice se mogu igrati samo u dvoranama koje ispunjavaju uslove za odigravanje utakmica.

Pravilnikom o tehničkim normativima za odigravanje utakmica u sportskim dvoranama utvrđuju se uslovi koje moraju ispuniti dvorane.

Direktor takmičenja OS BiH na zahtjev klubova izdaje sertifikate za dvorane koje ispunjavaju uslove takmičenja u Premijer ligi BiH.

#### Član 7.

Utakmice redovnih kola Premijer lige igraju se subotom i petkom.

Subotom i radnim danom (ukoliko je termin predviđen Kalendarom takmičenja ili je odobren od direktora takmičenja OS BiH) utakmice moraju započeti između 14:00 i 19:00 časova.

U slučaju duplog programa, prva utakmica mora biti zakazana najkasnije u 16:00 časova, a druga tri sata kasnije.

Utakmice koje se Kalendarom takmičenja ili po odobrenju direktora takmičenja OS BiH igraju nedeljom, moraju započeti između 10:00 i 16:00 časova.

Direktor takmičenja može odobriti i odrediti i drugo vrijeme za odigravanje utakmice kada za to postoje posebno opravdani razlozi (npr. TV prenos).

Član 8. Osim razloga iz člana 24. i člana 50. Pravilnika o takmičenju OS BiH, termin utakmice se može promijeniti na zahtjev odbojkaškog kluba koji učestvuje u zvaničnim međunarodnim takmičenjima ili na međunarodnim utakmicama i

tradicionalnim turnirima revijalnog karaktera, koji su u kalendaru odbojkaških događaja utvrđenog od strane organa OS BiH, OS F BiH i OS RS i za čije učešće postoji saglasnost nadležnog organa, a poklapaju sa terminima redovnog kola lige.

Zahtjev za promjenu termina odigravanja utakmice podnosi se najkasnije 10 dana prije utvrđenog termina odigravanja utakmice.

U prethodnim slučajevima utakmice zvaničnih takmičenja OS BiH igraju se u utorak, srijedu ili četvrtak koji predhodi redovnom kolu ili u posebno opravdanim razlozima najkasnije do početka narednog kola.

#### Član 9.

Radi regularnosti takmičenja, direktor takmičenja OS BiH će odrediti da se utakmice poslijednja dva kola Premijer lige BiH igraju istog dana u isto vrijeme ako njihov rezultat može uticati na konačan poredak na tabeli ili samo one utakmice koje mogu na to uticati. Direktor takmičenja određuje vrijeme (satnicu) igranja utakmica.

#### Član 10.

Jedan čas prije početka utakmice, teren mora biti spreman za odigravanje utakmice. Delegat i prvi sudija odlučuju o sposobnosti terena na kome treba da se odigra utakmica.

U slučaju više sile, delegat i prvi sudija odlučuju koliko su smetnje objektivne prirode i o vremenu početka utakmice.

#### Član 11.

Ako je u dvorani temperatura niža od +12 stepeni Celzijusa i veća od +25 stepeni Celzijusa ili svjetlost manja od 500 luxa, delegat ostavlja 30 minuta vremena domaćinu da nedostatke otkloni i stvori normalne uslove za odigravanje utakmice.

#### Član 12.

Dužnosti domaćina su:

- 1) da istakne zastavu Bosne i Hercegovine i entiteta u kome se utakmica igra, a klub iz Brčkog u skladu sa važećim propisima u Distriktu,
- 2) da istakne baner Odbojkaškog saveza BiH (dimenzija 1,7 x 1 m) u dvorani tokom odigravanja utakmica stalnih takmičenja Odbojkaškog saveza BiH, da istakne obilježija generalnog sponzora i sponzora Saveza i Premijer lige (ako postoje), da i na drugi način u skladu sa uputama direktora takmičenja OS BiH, promoviše sponzore OS BiH,
- 3) da organizuje redarsku službu od najmanje 4 redara u dvorani i 1 redara na ulazu-izlazu iz dvorane koji su punoljetni sa vidljivom oznakama REDAR,
- 4) da obezbijedi 12 ispravnih lopti MIKASA MVA – 200 ili MIKASA V200W za zagrijavanje klubova i 3 lopte za odigravanje utakmice,  
Upotreba lopte MIKASA MVA 200, biće dozvoljena do kraja takmičarske sezone 2020/2021.
- 5) da obezbijedi najmanje 5 skupljača lopti, 6) da obezbijedi brisanje terena sa 2 brza brisača,
- 7) da obezbijedi elektronski i ručni semafor,
- 8) da obezbijedi važeći međunarodni zapisnik,
- 9) da postavi sto i stolice za službena lica predviđene članom 20. Propozicija,
- 10) da postavi posebne klupe ili stolice za rezervne odbojkaše-ice, trenere, ljekara i fizioterapeuta, i 2+2 stolice za isključene odbojkaše-ice,
- 11) da obezbijedi sudijsku stolicu sa platformom i odgovarajućom zaštitom za sprečavanje povreda odbojkaša-ica,
- 12) da obezbijedi tablice sa brojevima za zamjene odbojkaša-ica tokom utakmice od broja 1 do 20 za oba kluba,

- 13) da obezbijedi listu za prijavu odbojkaša-ica i listiće za postavu,
- 14) da obezbijedi 2 odnosno 4 jednoobrazne zastavice za linijske sudije, visinomjer, termometar, manometar i luksometar,
- 15) da obezbijedi dežurno vozilo vidno označeno („DEŽURNO VOZILO“ – „VOZAČ \_\_\_\_\_ TELEFON \_\_\_\_\_“) i ljekara sa priručnom apotekom za pružanje prve pomoći,
- 16) da prijavi utakmicu organu unutrašnjih poslova i o tome pribavi potvrdu ili ovjeru na kopiji prijave,
- 17) da primjenjuje propise kojima je regulisano pitanje održavanja javnog reda i mira i sprečavanja nasilja i nedoličnog ponašanja na sportskim priredbama (odbojkaškim utakmicama),
- 18) da obezbijedi neophodne higijensko-sanitarne uslove,
- 19) da obezbijedi razglas i službenog spikera u svim stalnim takmičenjima,
- 20) da omogući televizijski prenos i pristup svim medijima, a gostujućem klubu snimanje utakmice, ako to zvanično zatraži najkasnije 3 dana prije odigravanja utakmice,
- 21) da stvori uslove za održavanje konferencije za štampu poslije odigrane utakmice uz učešće predstavnika klubova, trenera i kapitena,
- 22) da kamerom snimi kompletnu utakmicu i snimak utakmice čuva u arhivi kluba najmanje 30 dana i isti na zahtjev direktora takmičenja dostavi u kancelariju Saveza, a na zahtjev delegata-kontrolora obavezan mu je snimak predati odmah nakon utakmice,
- 23) tokom odigravanja finalnih utakmica KUP-a BiH i finalnih turnira mlađih kategorija OS BiH, organizatori su dužni obezbijediti zvaničnog fotografa na utakmicama, koji će zabilježiti minimalno 15 visoko kvalitetnih fotografija sa svake utakmice. Organizator utakmice/turnira fotografije je obavezan dostaviti kancelariji OS BiH (elektronskom poštom) jedan dan nakon odigravanja utakmice/turnira,
- 24) da vodi statistiku na računaru u programu dostavljenom od direktora takmičenja OS BiH i istu dostavi elektronskom poštom u kancelariju Saveza, najkasnije 24 časa po završetku utakmice,
- 25) da odmah po završetku utakmice medijima dostavi izvještaj sa utakmice na obrazcu koji je propisan od strane direktora takmičenja OS BiH (spisak medija dostaviće kancelarija OS BiH).

#### Član 13.

Predstavnik kluba domaćina i delegat-kontrolor dužni su se sastati 75 minuta prije termina odigravanja utakmice radi pripreme tehničkog sastanka.

Klub domaćin utakmice obavezan je organizovati tehnički sastanak 60 minuta prije zakazanog termina odigravanja utakmice na kojem su obavezni učestvovati delegat, predstavnik kluba domaćina i gostujućeg kluba i predstavnik sportske dvorane u kojoj se odigrava utakmica.

#### Član 14.

Ukoliko organizator nije izvršio sve tehničke pripreme, delegat i prvi sudija odrediće vrijeme od 15 minuta da se uočeni propusti dovedu u red.

Ako se propusti ne otklone utakmica se neće odigrati i registrovaće se službenim rezultatom.

Odluka o neodigravanju utakmice i razlozi unose se u Zapisnik, koji potpisuje delegat, **prvi** sudija i kapiteni oba kluba.

#### Član 15.

Klub domaćin tehnički je organizator utakmice, odgovoran za cjelokupnu organizaciju prije, u toku i poslije odigrane utakmice.

#### Član 16.

Klub domaćin obavezan je da pisanim putem obavijesti službena lica, protivničku ekipu, direktora takmičenja OS BiH, nadležnu sudijsku organizaciju koja određuje zapisničare i linijske sudije o terminu odigravanja utakmice, najkasnije 5 dana prije odigravanja utakmice.

#### Član 17.

Za svaku utakmicu klub domaćin pisanim putem određuje svog predstavnika koji se stara o svim poslovima organizacione prirode i saraduje sa službenim licima i gostujućim klubom. Osoba koja je određena za predstavnika kluba domaćina ne može biti mlađa od 18 godina.

#### Član 18.

Klub domaćin je obavezan:

- a) da najkasnije jedan sat prije početka utakmice, stavi na raspolaganje normalno zagrijane svlačionice za klubove i službena lica sa tušem i toplom vodom,
- b) da po odigranoj utakmici obezbjedi posebnu prostoriju za obavljanje administrativnih poslova vezanih za utakmicu (pisanje protokola, uzimanje izjave, najave žalbe, itd.)
- c) da odmah po odigranoj utakmici omogući delegatu da elektronski, telefaksom ili telefonski obavijesti direktora takmičenja OS BiH o rezultatu utakmice (setovi i poeni), kao i o eventualnoj žalbi i dobijenim crvenim i drugim kartonima.

#### Član 19.

Na utakmicama odbojkaških liga mogu nastupiti takmičari uz ovjerenu licencu nadležnog organa i važeći ljekarski pregled u skladu sa Pravilnikom o zdravstvenoj zaštiti u OS BiH.

#### Član 20.

Za vrijeme trajanja utakmice za zapisničkim stolom mogu sjediti samo delegat, zapisničar, rukovaoc semafora. Pored zapisničkog stola sa bočne strane sjede predstavnik kluba domaćina i dežurni ljekar.

Za vrijeme trajanja utakmice na klupi za rezervne odbojkaše-ice mogu se nalaziti samo u zapisniku prijavljeni odbojkaši-ice, trener, dva pomoćnika trenera, ljekar i fizioterapeut-maser.

Klub je obavezan obezbjediti na svakoj utakmici najmanje 10 (deset) odbojkaša-ica, trenera i pomoćnog trenera.

Zabranjeno je korištenje mobilnih telefona za zapisničkim stolom i isti moraju biti isključeni. Mobilni telefon može biti korišten od strane zvaničnog predstavnika kluba i dežurnog ljekara samo u slučaju hitne potrebe da kontaktiraju nadležne službe (zdravstvena ustanova, vatrogasna jedinica, policijska stanica i sl.). Delegat-kontrolor je dužan lično da ispoštuje ovu odredbu i obezbjedi da je ispoštuju i druge osobe.

#### Član 21.

Oprema odbojkaša-ica mora da odgovara zahtjevima Međunarodnih pravila igre i svi odbojkaši-ice moraju da imaju jednoobraznu opremu, osim libera.

#### Član 22.

Za utakmice delegate delegira direktor takmičenja OS BiH i kontroliše njihov rad.

Prvog i drugog sudiju i eventualno rezervnog sudiju određuje vrhovni sudija OS BiH.

Direktor takmičenja OS BiH odgovoran je za delegiranje svih službenih lica. Vrhovni sudija OS

BiH i nadležne teritorijalne sudijske organizacije dužni su da poštuju uputstva i odluke direktora takmičenja OS BiH u vezi sa delegiranjem.

Vrhovnog sudiju OS BiH imenuje Upravni odbor Saveza na prijedlog Komisije za sudijska pitanja.

Zapisničara i linijske sudije delegiraju nadležne teritorijalne sudijske organizacije, odnosno predsjednici sudijskih odbora. Delegirani zapisničari i linijske sudije moraju biti najmanje sa „C“ liste OS F BiH i OS RS sa potrebnim iskustvom u obavljanju dužnosti.

Svaki klub koji izrazi želju da mu se pojedine sudije ne delegiraju, obavezan je pisano da zatraži izuzeće, 15 dana prije početka zvaničnog takmičenja, sa navođenjem konkretnih činjenica.

U toku takmičarske sezone, ovakvi zahtjevi se ne moraju uzimati u obzir. O tome odlučuje direktor takmičenja OS BiH uz pribavljeno mišljenje vrhovnog sudije OS BiH.

Za pojedine utakmice, za koje procjeni da postoji potreba, direktor takmičenja OS BiH može uputiti specijalnog posmatrača OS BiH. Ukoliko zahtjev za specijalnim posmatračem podnese klub isti je dužan snositi troškove specijalnog posmatrača (prevoza, dnevnice i taksa delegata-kontrolora u skladu sa Odlukom o naknadama službenim licima za takmičarsku 2020/2021. sezonu).

#### Član 23.

Sudijski kolegij (prvi i drugi sudija, zapisničar i linijske sudije) je obavezan da se 75 minuta prije zakazanog termina odigravanja utakmice javi delegatu.

Ukoliko delegirani prvi sudija ne dođe na utakmicu, zamijenice ga drugi sudija, a drugog sudiju može da zamijeni sudija sa odgovarajućim zvanjem, prisutan u sali i to samo uz obostranu saglasnost klubova koja se konstatuje prije početka utakmice, potpisom oba kapitena u zapisniku. Ukoliko na utakmicu ne dođu delegirani zapisničar i linijske sudije, delegat-kontrolor obaviće dužnost vođenja zapisnika ako u dvorani nije prisutan ni jedan sudija sa odgovarajućim sudijskim zvanjem.

#### Član 24.

Prvi sudija utakmice obaviće sve dužnosti delegata, ukoliko određeni delegat ne pristupi utakmici.

#### Član 25.

Poslije završetka utakmice kapiteni oba kluba obavezni su da potpišu zapisnik. Zapisnik se vodi u tri primjerka, a original se šalje direktoru takmičenja OS BiH.

#### Član 26.

Na utakmicu i rezultat utakmice, zbog sumnje na povredu Zvaničnih pravila odbojkaške igre, dopuštena je žalba Komisiji za kontrolu i unapređenje suđenja OS BiH. Podnosilac žalbe dužan je dostaviti potrebne podatke kojima potkrepljuje činjenice iz žalbe.

Žalba mora biti najavljena u zapisniku sa odigrane utakmice i obrazložena osnovnim motivima odmah po završetku utakmice prije potpisivanja-ovjere zapisnika.

Taksa za žalbe utvrđuje se Aneksom Propozicija stalnih takmičenja OS BiH.

#### Član 27.

Pisano obrazloženje žalbe mora se uputiti Komisiji za kontrolu i unapređenje suđenja najkasnije 48 časova po odigranoj utakmici, preko kancelarije OS BiH.

Ukoliko klub odustane od predhodno najavljene žalbe, dužan je da o tome pisanim aktom izvijesti Komisiju za kontrolu i unapređenje suđenja OS BiH u roku od 24 časa po odigranoj utakmici.

Žalbe koje ne ispunjavaju navedene uslove neće se uzimati u postupak i odbacivaće se iz formalnih razloga.

#### Član 28.

Žalbe koje se odnose na pravo nastupa učesnika u takmičenju, neispravnost terena ili uređaja, temperaturu vazduha ili svijetlo, podnose se prije početka utakmice.

#### Član 29.

Komisija za kontrolu i unapređenje suđenja OS BiH, dužna je da donese odluku po žalbi najkasnije 7 dana od prijema žalbe.

#### Član 30.

Na odluku Komisije za kontrolu i unapređenje suđenja OS BiH može se uložiti žalba u roku od 7 dana od dana prijema Komisiji za sudijska pitanja OS BiH.

Drugostepena odluka po žalbi mora biti donešena u roku od 10 dana od dana prijema žalbe i u roku od tri dana po održavanju sjednice upućena žalioцу.

Neblagovremene i nepotpune žalbe neće se uzimati u postupak, o čemu predsjednik Komisije za sudijska pitanja OS BiH obavještava podnosioca žalbe.

Taksa za žalbe utvrđuje se Aneksom Propozicija stalnih takmičenja OS BiH.

#### Član 31.

Mimo žalbi iz člana 26. klub može direktoru takmičenja OS BiH najaviti preko delegata zvaničan prigovor na postupke i ponašanja učesnika u takmičenju.

Ova vrsta prigovora mora biti najavljena u zapisniku sa odigrane utakmice i obrazložena osnovnim motivima, odmah po završetku utakmice prije potpisivanja-ovjere zapisnika.

Najavljeni prigovor sa pisanim obrazloženjem uz navođenje svih činjenica dostavlja se podnosiocu u roku od 48 sati od završetka utakmice.

Taksa na prigovor utvrđuje se Aneksom Propozicija stalnih takmičenja OS BiH.

Prigovori koji ne ispunjavaju navedene uslove neće se uzimati u postupak i biće odbačeni od strane direktora takmičenja OS BiH.

#### Član 32.

Direktor takmičenja OS BiH ili Komisija za kontrolu i unaprđenje suđenja OS BiH (zavisno od nadležnosti), postupiće po prigovoru u roku od 10 dana (pregledati snimak utakmice, pribaviti dopunski izvještaj delegata-kontrolora i dr.). Nakon provedene procedure direktor takmičenja OS BiH ili Komisija će javno saopštiti svoj stav i izreći eventualne sankcije.

#### Član 33.

Od uplata kotizacija klubova učesnika takmičenja, formira se fond zajedničkih troškova, koji služe za pokriće troškova takmičenja:

- 1) troškovi izdavanja Biltena,
- 2) troškovi odlaska specijalnih posmatrača na određene utakmice u cilju zaštite regularnosti takmičenja,
- 3) troškovi nabave pehara i medalja za takmičenje,
- 4) troškovi telefona, telegrama i svih poštanskih troškova u vezi sa takmičenjem,
- 5) lična primanja radnika koji obavljaju poslove za potrebe takmičenja,
- 6) troškovi kancelarijskog materijala i birotehničkih usluga za sve poslove i potrebe takmičenja,
- 7) ostali troškovi vezani za takmičenje.

#### Član 34.



Službenim licima na utakmicama pripada taksa za obavljenju dužnost, dnevnice i putni troškovi za putovanje u odlasku i povratku do mjesta stalnog boravka u skladu sa odlukom Upravnog odbora OS BiH.

Ukoliko se utakmica ne odigra, službenim licima pripada 50% od propisane takse i svi drugi troškovi iz predhodnog stava. Ovo pravo ne pripada službenim licima ako su istog dana na duplom programu naplatili taksu za jednu utakmicu.

Službena lica su dužna da prilikom dolaska na utakmicu, koriste najkraću relaciju.

Odlukom Upravnog odbora Saveza utvrđuje se visina taksi i druga prava službenih lica.

#### Član 35.

Naknade službenim licima na utakmicama klub isplaćuje na sljedeći način:

- takse na žiro račun službenih lica najkasnije dan prije odigravanja utakmice za koju su delegirani, a ako klub želi može to učiniti i gotovinski prije početka utakmice,
- putni troškovi i dnevnice isplaćuju se u gotovini prije odigravanja utakmice,
- u slučaju potrebnog noćenja nekog od službenih lica, klub je dužan da obezbijedi i plati smještaj u hotelu ili motelu minimalne kategorije tri zvjezdice u gradu u kome se igra utakmica.

Klub koji na navedeni način ne izvrši obavezu prema službenim licima neće moći odigrati utakmicu.

Utakmice neodigrane iz navedenih razloga registruju se službenim rezultatom, a protiv kluba se pokreće disciplinski postupak.

#### Član 36.

Svaki klub učesnik stalnih takmičenja OS BiH dužan je na zahtjev Agencije za antidoping kontrolu Bosne i Hercegovine obezbijediti sljedeće:

- uslove za nesmetano uzimanje uzoraka za doping kontrolu (tokom i van takmičenja).
- uslove za održavanje godišnjih predavanja u okviru edukacije klubova o svim pitanjima vezanim za doping u sportu.

Prisustvo predavanjima i pristup davanju uzoraka obavezno je za sve odbojkaše-ice, trenersko i ljekarsko osoblje svakog odbojkaškog kluba učesnika stalnih takmičenja OS BiH.

Svako odbijanje podvrgavanju antidoping kontroli i u slučaju da se utvrdi korištenje nedozvoljenih sredstava i metoda (tokom i van takmičenja) biće sankcionisano u skladu sa pravilima i odredbama Svjetske antidoping agencije (Svjetski antidoping kodeks - kazne za pojedince), Instrukcija za provođenje i primjenu Svjetskog antidoping kodeksa i Pravilnika za borbu protiv dopinga u sportu u BiH.

#### Član 37.

Prekršaji učinjeni protiv odredbi Pravilnika o takmičenju OS BiH, ovih Propozicija i drugih akata Saveza koja regulišu takmičenje podliježu disciplinskoj odgovornosti prema Pravilniku o disciplinskoj i materijalnoj odgovornosti.

Direktor takmičenja OS BiH prikuplja potrebne dokaze za pokretanje postupka, a postupak vodi disciplinski sudija.

Direktor takmičenja OS BiH ima pravo i obavezu da za propuste koji nisu konkretno sankcionisani Pravilnikom o disciplinskoj i materijalnoj odgovornosti, kazni službeno lice zabranom obavljanja dužnosti od 1-4 utakmice, a zbog nesportskog ponašanja zvaničnih predstavnika kluba, odbojkaša-icu, trenera i drugog učesnika u takmičenju zabranom nastupa od 1-4 utakmice.

U slučaju da propuste učini zvanični predstavnik kluba na utakmici, klub će biti sakcionisan novčanom kaznom 200 - 1.000 KM.

#### Član 38.

Odbojkaški subjekt dužan je saradivati sa sredstvima informisanja na korektan način i u obostranoj saradnji doprinositi popularizaciji i razvoju odbojkaškog sporta.

Zabranjeno je u javnim nastupima davati izjave koje su neistinite i izjave kojima se na nesportski način, suprotno Kodeksu ponašanja OS BiH, vrijeđaju drugi odbojkaški subjekti ili treća lica, te nanosi šteta ugledu i interesu Saveza.

Smatraće se da je klub ili pojedinac učinio ovaj prekršaj kada javno istupi prije korištenja prava iz člana 26. i 31. Propozicija i okončanja postupka po prigovoru.

Direktor takmičenja OS BiH obavezan je za izjavu iz predhodna dva stava, licu koje je dalo izjavu odlukom izreći zabranu nastupa od 1-4 utakmice, a klub čiji je član dao izjavu kazniti novčano sa 500 - 1.500 KM.

#### Član 39.

Za povredu međunarodnih pravila igre, Pravilnika o takmičenju i ostalih normativnih akata Saveza i odredbi Propozicija i Aneksa propozicija takmičenja, direktor takmičenja OS BiH odlukom izriče mandatne kazne za prekršaje koji nisu sankcionisani Pravilnikom o materijalnoj i disciplinskoj odgovornosti, u visini od 100 – 2.500 KM, i to:

1. Nepoštovanje rokova administrativne prirode 100 - 300 KM
2. Nepropropisna oprema učesnika u takmičenju 100 - 300 KM
3. Neispunjavanje uslova terena i dvorane, te propusti u organizaciji utakmica koji nisu sankcionisani Pravilnikom o disciplinskoj i materijalnoj odgovornosti 100 - 1.000 KM
4. Nesportsko ponašanje navijača 300 - 1.500 KM
5. Incident na utakmici izazvan od strane zvaničnih učesnika utakmice 500 - 2.000 KM
6. Prekid utakmice 500 - 2.500 KM
7. Nastup kluba bez jednog od trenera 300 - 1.500 KM
8. Nastup kluba bez oba trenera 500 - 2.000 KM
9. Nastup sa manje od 10 odbojkaša-ica na utakmici za svakog nedostajućeg odbojkaša-icu po 100 KM
10. Nastup sa manje od 12 odbojkaša-ica na Finalu Kupa 100 - 500 KM
11. Neuredno izvršavanje finansijskih obaveza 100 - 500 KM
12. Propusti organizaciono-tehničke i administrativne prirode sudija, delegata-kontrolora i drugih službenih zvaničnih lica 100 - 500 KM
13. Izgubljena utakmica službenim rezultatom, zbog neopravdanog nedolaska na utakmicu, nepripremljenih uslova za odigravanje utakmice, neizvršenih finansijskih obaveza i drugih razloga 1000-2000 KM
14. Nedostavljanje ili dostavljanje nekvalitetnog snimka odbojkaške utakmice 500 - 2.500 KM
15. Ometanje rada delegata-kontrolora, sudija i zapisničkog stola 100 - 500 KM
16. Delegiranje zapisničara i linijskih sudija suprotno članu 22. Propozicija takmičenja OS BiH (Premijer liga) 200 - 1.000 KM
17. Nepoštivanje kalendara takmičenja OS BiH 1.000 KM
18. Istupi predstavnika ili članova kluba na društvenim mrežama ili animiranje drugih odbojkaških subjekata, sportske i društvene javnosti komentarima ili prigovorima na rad organa i službenih lica prije postupanja po prigovoru ili žalbi 300 – 1000 KM

Ove sankcije se odnose na propuste u svim stalnim takmičenjima OS BiH.

#### Član 40.

Delegat je obavezan u slučaju nesportskog ponašanja navijača (nasilno, vulgarno i uvredljivo) i nošenja neprimjerenih obilježja i poruka da od domaćina utakmice zatraži da navijači prestanu sa takvim navijanjem i da uklone poruke i obilježja.

Ukoliko ne dođe do prekida nesportskog navijanja i ponašanja ili se ono ponovi, delegat je obavezan udaljiti taj dio navijača iz sportske dvorane. ukoliko domaćin ne ispuni nalog delegata o udaljenju dijela publike ili kompletne publike, utakmica se neće nastaviti, a protiv kluba se pokreće disciplinski postupak.

#### Član 41.

U slučajevima nesportskog ponašanja u većem obimu i upućivanja izrazito vulgarnih izraza prema gostujućem klubu, službenim licima i publici i pokušaj fizičkog napada na bilo kog učesnika u takmičenju direktor takmičenja OS BiH dužan je izreći zabranu igranja bez publike na domaćem terenu 1-3 utakmice ili zabranu igranja na tom terenu 1-3 utakmice i novčanu kaznu od 500-2.500 KM.

U slučaju zabrane igranja na svom terenu kažnjeni klub kao domaćin mora zakazati utakmicu u mjestu udaljenom najmanje 100 kilometara od mjesta iz kojeg je klub kojem je izrečena zabrana, stim da to mjesto odigravanja utakmice ne može biti udaljenije za gostujući klub od mjesta odakle je klub kojem je izrečena zabrana.

Član 42. Prije donošenja odluke o izricanju sankcija u skladu sa Propozicijama direktor takmičenja OS BiH dužan je pribaviti kompletnu dokumentaciju od delegata utakmice koji uz delegatski izvještaj dostavlja i dopunske izjave službenih lica i ostalih učesnika u takmičenju koji su povezani sa spornim slučajevima, događajima ili postupcima.

Prilikom izricanja kazni direktor takmičenja je dužan voditi računa o težini učinjenog prestupa i o činjenicama da su odbojkaški subjekti za iste propuste već kažnjavani u tekućoj sezoni.

#### Član 43.

Na izrečene sankcije od strane direktora takmičenja OS BiH iz člana 37., 38., 39. i 41. Propozicija može se izjaviti žalba Odboru za hitna pitanja OS BiH.

U žalbi i uz žalbu moraju biti navedeni i priloženi adekvatni dokazi kojima se pobijaju činjenice utvrđene u prethodnom postupku. U suprotnom žalba se neće uzeti u razmatranje, o čemu predsjednik Odbora za hitna pitanja OS BiH obavještava podnosioca žalbe.

Taksa na žalbu utvrđuje se Aneksom propozicija stalnih takmičenja u OS BiH.

#### Član 44.

Za svaki kazneni karton, klub je dužan uplatiti u roku od 5 dana sledeći iznos:

50 KM	-crveni karton,	
100 KM	-žuti-crveni karton (zajedno),	150
KM	-žuti-crveni karton (odvojeno).	

Učesnik takmičenja koji u toku takmičarske sezone dobije:

- treći crveni karton, ili
- jedan crveni i jedan žuto-crveni karton zajedno, ili
- dva crvena i jedan žuto-crveni karton zajedno, ili
- dva žuto-crvena kartona zajedno, automatski nema pravo nastupa za klub u prvoj narednoj utakmici stalnih takmičenja u OS BiH.

Učesnik takmičenja koji dobije žuto-crveni karton odvojeno, nema pravo nastupa na dvije naredne utakmice stalnih takmičenja OS BiH.

Klub je odgovoran za nastup učesnika u takmičenju koji nema pravo nastupa zbog dobijenih kaznenih kartona.

Takmičarski organ vodi evidenciju kaznenih kartona za takmičarsku sezonu sa podacima o: učesniku takmičenja, utakmici, datumu, vrsti kartona, iznosu novčane kazne, datumu uplate kazne i dr.

#### Član 45.

Ako klub napusti takmičenje tokom takmičarske sezone dužan je na račun OS BiH uplatiti kaznu u iznosu od 5.000 KM, koja se dijeli srazmjerno na OS BiH i ostale klubove učesnike takmičenja u Premijer ligi BiH u istoj konkurenciji.

#### Član 46.

Odbojkaški subjekat koji ne uplati kaznu u roku od 5 dana od dana prijema saopštenja o izrečenoj mandatnoj kazni nema pravo nastupa u takmičenju dok kaznu ne uplati.

Ukoliko se radi o odbojkaškom klubu, zbog izgubljenog prava nastupa na utakmici po osnovu neizvršenih finansijskih obaveza, utakmica se registruje službenim rezultatom za protivničku ekipu.

Neizvršavanje finansijskih obaveza (neplaćene kotizacije za takmičenje, kazni iz nadležnosti direktora takmičenja i disciplinskog sudije) povlači pokretanje disciplinskog postupka i kaznu za prestup prema Pravilniku o disciplinskoj i materijalnoj odgovornosti.

#### Član 47.

Obaveza klubova je da osigura članove kluba od posljedica nesretnog slučaja (u slučaju povrede i u slučaju smrti) za vrijeme priprema, treninga, utakmica i putovanja na utakmice.

Ako klub propusti da osigura članove kluba materijalno je odgovoran da snosi troškove liječenja od povrede na pripremama, treninzima, utakmicama i putovanjima na utakmice, kao i druge troškove ako postoje trajne posljedice od povreda.

#### Član 48.

Odredbe Pravilnika o takmičenju, Pravilnika o disciplinskoj i materijalnoj odgovornosti, Aneksa propozicija takmičenja i ostala akta, primjenjivaće se kod svih pitanja koja nisu regulisana ovim Propozicijama.

#### Član 49

Od dana početka takmičenja (prvog kola), ne mogu se vršiti dopune i izmjene Propozicija takmičenja.

#### Član 50.

Sastavni dio Propozicija čine dokumenta koja donosi Upravni odbor OS BiH:

- Aneks Propozicija stalnih takmičenja za 2020/2021. sezonu,
- Pravilnik o tehničkim normativima za odigravanje utakmica u sportskim dvoranama u takmičarskoj 2020/2021. sezoni,
- Pravilnik o licenciranju učesnika u takmičenju u takmičarskoj 2020/2021. sezoni,
- Odluka o naknadama službenim licima u takmičarskoj 2020/2021. sezoni, - Kriteriji za rangiranje delegata u takmičarskoj 2020/2021. sezoni, - Kalendar takmičenja za takmičarsku 2020/2021. sezonu.

Sastavni dio Propozicija čine i dokumenta koja donosi direktor takmičenja OS BiH:

- Uputstvo za organizovanje odbojkaških utakmica u takmičarskoj 2020/2021. sezoni,
- Uputstvo za obavljanje dužnosti delegata i delegata-kontrolora u takmičarskoj 2020/2021. sezoni,
- Uputstvo za rad brisača terena i skupljača lopti u takmičarskoj 2020/2021.

- Direktor takmičenja OS BiH u Biltenu takmičarska dokumenta objavljuje:
- Protokol za odigravanje utakmica Premijer lige BiH,
  - Protokol za organizovanje finalnih odbojkaških turnira (takmičenje mlađih kategorija), - Bergerove tablice,
  - Daljinar za obračun putnih troškova.

Aneksom propozicija se utvrđuju: klubovi koji su stekli pravo takmičenja u Premijer ligi i ostalim takmičenjima za takmičarsku sezonu, taksa na žalbe, kotizacija za fond zajedničkih troškova takmičenja, tabela „LIDER SPORTSKOG PONAŠANJA“ i dodjela pehara.

#### Član 51.

Tumačenje ovih propozicija daje Upravni odbor Saveza.

#### Član 52.

Propozicije stupaju na snagu danom donošenja, a primjenjivaće se za takmičarsku 2019/2020. sezonu.

#### Član 53.

Stupanjem na snagu ovih Propozicija prestaju da važe Propozicije usvojene na sjednici Upravnog odbora OS BiH broj: 01/1-323/19 od 27.06.2019. godine.

Broj:01/1-203-1/20  
Datum, 07.06.2020. godine

**PREDSJEDNIK**  
Alija Fatić, s.r.